



Nalinginnaasumik ataatsimeersuarnermit imaqarniliaq
Royal Greenland A/S
Reg.nr. A/S 184.991

Katuami, Nuuk, 23. januaari 2013 nal. 10.00

Peqataapput:

Piginnittoq sinnerlugu: Allaffimmi ingerlatsisoq Rasmus Pedersen Namminersorlutik Oqartussanit pisinnaatitsissut naapertorlugu.

Siulersuisuni ilaasortat: Niels Harald de Coninck-Smith (Siulittaasoq), Sara Heilmann, Niels Ole Møller, sulisut sinniisaat.

Qullersaqarfik: Suliffeqarfissuarmi ingerlatsisoq pisortaanerlu Mikael Thinghuus, Aningaasaqarnermut pisortaq Nils Duus Kinnerup.

Kukkunersiuisoq: Kukkunersiuisoq naalagaaffimmit akuerisaasoq Jens Vinther Frederiksen, KPMG Grønland.

Aqutsisoq: Eqqartuussissuserisoq Gedion Jeremiassen.

Imaqarniliortoq: Inatsisilerinermi siunnersorti Andor Thomsen.

Oqalutsi: Nutserisoq Hans Pavia Rosing

Allat: Tusagassiortut, ataatsimiigiaqqusat il.il.

Siulersuisuni siulittaasoq Niels Harald de Coninck-Smith ataatsimeersuarnermi tikilluaqqusivoq kingornalu Gedion Jeremiassen aqutsisussatut siulersuisunit maleruagassat malillugit toqqarneqartoq oqaaseqartillugu.

Aqutsisoq oqaaseqartinneqartussanngornini pillugu qujavoq nalunaarutigalugulu 10. januaari 2013-imi allakkani ilanngullugu nalunaarutigineqartoq maleruagassani § 4 naapertorlugu piffissaq eqqorlugu ataatsimiigiaqqusisoqarsimasoq. Ataatsimiigiaqqussut ullormi qulaani taaneqartumi Erhvervsstyrelsenimut aamma nassiunneqarpoq, takuuk aktieselskabit pillugit inatsimmi § 73, imm. 3-mi imm. 2,

taamatuttaaqaq ataatsimeersuortoqarnissaa pillugu sulisunut nalunaaruteqartoqarpoq , takuuk aktieselskabit pillugit inatsimmi § 73, imm. 2, 4 5-ilu.

Taamatuttaaqaq oqaatigaa, Kalaallit Nunaanni Namminersorlutik Oqartussat kisimi piginnittuusooq sinnerlugu allaffimmi ingerlatsisoq Rasmus Pedersen piginnaatitsissut malillugu ataasimeeqataasoq.

Tamatuma kingorna apeqqutigaa, ataatsimeersuarnissamut aggersaasoqarsimaneranut tunngasumik oqaaseqartoqarusunnersooq, oqaaseqartoqanngimmallu maleruagassat malillugit, aalajangiisinnaassuseqarfiulluni inatsisillu malillugit ataatsimeersuarneq ingerlanneqartoq nalunaarutigaa.

Nalunaaruteqareermat oqaluuserisassat saqqummiunneqarput, makkuusut:

- a) Ingerlatseqatigiiffiup ingerlanera pillugu nalunaaruteqarneq.
- b) Ukiumoortumik nalunaarusiamik akuerisassanngorlugu saqqummiineq.
- c) Ukiumoortumik nalunaarusiaq akuerineqartoq naapertorlugu sinneqartoortunik atuinnissamut imaluunniit annaasaqaatinik matussusiinnissamut aalajangiineq.
- d) Siulersuisuni ilaasortassanik qinersineq.
- e) Siulersuisuni siulittaasussamik qinersineq.
- f) Siulersuisup siulittaasunilu ilaasortat akissarsiassaannik aalajangersaaneq.
- g) Kukkunersiuisunik qinersineq.

Imm. a pillugu) Ingerlatseqatigiiffiup ingerlanera pillugu nalunaaruteqarneq

Oqaluuserisassat aqutsisumit saqqummiunneqareermata siulersuisuni siulittaasoq Niels Harald de Coninck-Smith oqaaseqartinneqarpoq , imatullu nalunaaruteqarpoq:

"Royal Greenland A/S-imi pitsaasumik angusaqartoqarsimaneranik ukiuni arlalinni saqqummiussisoqanngilillartorlu siorna ataatsimeersuartitsinermi angusat pitsaasut siulliit saqqummiunneqarsinnaasimapput. Tamanna pitsaasunik angusaqarfiusussanik nutaanik anguniagaqarnissanut alloriarneq siulliusimavoq. Ataasimeersuarnermi matumani angusap saqqummiunneqartup uppersarsiseqperiaannarpaa, suliffeqarfiup aningaasaqarniarneranut pitsanngorsaannissamut alloriarnerit toqqarneqarsimasut eqqortuusut.

2011/2012-imut ukiumoortumik naatsorsuutit 30. septembari 2012-ip tungaanut atuuffeqartut naapertorlugit Royal Greenlandip akileraarutissat ilanngaatigereerlugit 136 mio. kr.-t angusimavai, suliffeqarfiullu oqaluttuarisaanerani aatsaat taama pitsaatigisumik angusaqartoqarpoq.

Pisortaanermit Mikael Thinghuusimit ingerlanneqartussamik angusaq pillugu saqqummiussineq tassuugu ingerlanneqassaaq.

Ukiumi pineqartumi angusassatut naatsorsuutigineqartoq ilimagisamit qaffasinnerujussuuvoq, tamannalu naammagisimaarnarpoq. Ineriartorneq pitsaasoq suliffeqarfimmik piginnittumut, Namminersorlutik Oqartussanut, toqqaannartumik iluaqutaammat nuannaarutigaarput, tamatumani ingerlatseqatigiiffiit

akileraarutaannik akiliinermik, landskarsimut taarsigassanik ikilisaqqinnermik imaqqarpoq, tamatumuunalu iluanaarutit atorlugit akiliinermik imaqqarluni.

Assigiinngitsorpassuartigut suliffeqarfiup pitsanngorsarneqarnera peqqutaalluni pitsaasumik angusaqqartoqqarpoq. Tamatumani aqutsisut pikkorissut angusaqqarluarnissamullu ilisimasaqqarluartut angusaqqarluarnermut peqqutaqqataalluinnarput. Sulisunik ineriartortitseqqinnerput avataaneersunillu sulisunik piginnaasaqqarluartunik toraagaqqarluta toqqaasarnerput peqqutaqqataalluinnarputtaaq.

Taamatuttaaq Kalaallit Nunaanneersunik nioqqutissanik tunisisarnitsinnut atatillugu niuernerup tungaatigut pissutsit pitsaasut nalaassimavagut. Tuniniaanermik nittarsaassinnermillu suliaqqartartuvut niuernermi periarfissat - minnerunngitsumik Kangiani niuernermi periarfissat – iluatsittumik atorluarsimavaat.

Ataatsimut isigalugu Atlantikup avannaani niuernerq naammaginarluinnartumik ineriartorpoq, naak raajartassiissutit ikilineqaraluartut tunisinnermilu akit qaffasinnerungaatsiaraluartut. Raajanik tunisassiorfiutivut nutarterluagaapput qaffasinnerujussuarnillu iluanaaruteqartalerlutalu tunisassiornermi ataatsimut aningaasaqqarniarnerput pitsaanerulerpoq.

Wilhelmshavenimi aamma Koszalinimi tunisassiorfiutivut aallaavigalugit Europami ukioq manna niuernerput unammillernartoqqarsimavoq. Minnerunngitsumik Wilhelmshavenimi, tamatumani umannillerterpassuaqqarluni suliainik ingerlatsigami.

Koszalinimi tunisassiorfik ukiorpaaluit matuma siornali pisiarineraniilli ingerlanniarnera uagutsinnut oqitsuusimangilaq. 2012-imi nutaanik aqutsisoqalernerup kingunerisaanik isumaqatigiissutinik pitsassuarnik attasaqqarlutalu isumaqatigiissutinik nutaanik arlaliusunik pissarsivugut. Taamaakkaluartuq iluanaarutaasut annertussusaat naammaginngilavut.

Siunissaq ungasinnerusoq eqqarsaatigalugu Europami niuernitta tungaatigut inerniliissaagut, tamannalu ukiup ingerlanerani pissaaq.

Siunissaq ungasinngitsoq eqqarsaatigalugu Glyngørimi suliaqarnerit aningaasatigut iluanaaruteqqarfiusinnaannginneri ukiup ingerlanerani nalunaarutigisariaqqarsimavarput. Taamaattumik Glyngørimi suliat ingerlanneqqartartut ilaat Aalborgimi suliarineqqartartunut kattunneqqassasut ilaallu allanut suliariumannittussarsiorneqqartassasut aalajangerneqqarpoq.

Suliaq ingerlanneqqartoq naammassineqqariarpat Royal Greenland Glyngørimi suliainik ingerlataqqarunnaassaaq, tamannalu Glyngørimi pigisat nalillit tungaatigut naatsorsuusiordernermi angusap inernera 40 mio. kr.-nik appasinneruneranik kinguneqqarpoq. Kilisaammik raajarniummik tunisineq 24 mio. kr.-nik iluanaaruteqqarfiuvoq.

Suliffeqarfiup akiitsui pissusissamisunngitsumik annertuallaarsimallutillu suli annertuallaarput. Taamaattumik akiitsut annertussusaasa pissusissamisoorderusumik annertussuseqalernissaat anguniarlugu ukkassingaatsiarluta sulinerput ingerlassimavarput. Akiitsut erniallit ukiumoortumik naatsorsuutit naammassineranni,

1,6 mia. kr.-upput, taakkualu 2007/2008-imut ukiumoortumik naatsorsuutit naammasseranni 2,3 mia. kr.-usunut sanilliunneqassapput.

Akiitsut annikillisinniarlugit pilersarusiornikkut ukkassilluni sulineq ingerlavoq ingerlatiinnarneqassallunilu. Royal Greenlandip akiitsui 1 mia. kr.-nut appartinniarneqarput, taamaasilluni siunissaq ungasinnerusoq eqqarsaatigalugu ingerlatseqatigiiffiup suliffeqarfittut pingaarnertut suliassa iluanni alliliinissaminut anguniagaqartilluni aningaasatigut naammattumik kiffaanngissuseqarluni sulinini ingerlassinnaanngussammagu. Akiitsut ikilinerisigut suliffeqarfiup ajalusooratarsinnaanissaa malunnartumik soorunami annikillissaaq.

Quersuarmi uninngasuutit ikilinissaat kissaataagaluartoq ikilisimangillat, quersuarmilu uninngasuuteqarnerup tungaatigut ineriartorneq pitsaasumik ingerlavoq.

Tamatumanilu tunisassianik ineriartortitseqqinneq peqquataalluni ukiup ingerlanerani kaaviiartitatigut 360 mio. kr.-t anguneqarput, anguneqartullu kaaviiartitanut ilanngullugit procentinngorlugit naatsorsoraanni 7 procentiullutik. Kaaviiartitat minnerpaamik 5 procentii ukiut tamaasa tunisassianik ineriartortitsinerminngaannit isertitsissutaasarnissaat anguniagaavoq.

Kalaallit Nunaanni suliffeqarfittut pingaarutilittut inissisimatilluta inuiaqatigiinnut akisussaaffeqarnerput nunamilu ineriartornermut egeersimaartumik peqataanissatsinnut pisussaaffeqarnerput arajutsisimangitsorujussuuarput. Tamanna Royal Greenland Academy aqutigalugu soorlu sammisarpaaluit tungaatigut piginnaanngorsaanertigut piimaarpoq, taamatuttaaq qaffasissumik ilinniagaqarnissamut tapiissuteqartarnissatsinnut aamma meeqqanut inuussuttunullu iluaqutaasunik timersornerup silarsuaani aqqissuussanut tapiissuteqartarnissatsinnut tunngaveqartumik tapiisarnermut maleruagassiaqarpugut.

Royal Greenland aalisakkanik tukertitaanngitsunik aalisarnek tunngavigalugu suliffeqarfittut ingerlanneqarpoq. Suliffeqarfiup ingerlanneqaannarsinnaanissaanut pisassat killeqarnerat soorunami pingaarutilimmik sunniuteqarput. Ilimagisat naapertorlugit raajat Kitaani aalisarnekartartut MSC-mik ilisarnaaqquserneqartalernissaat nuannaarutigaaarput. Raajartassiisutit annikillisikkiartorneqarnerat ilutigalugu MSC-mik ilisarnaaqqusersuisalernerup kingunerisaanik akinik qaffaasoqarsinnaanngussasoq neriuarportaaq.

Sinerissap qanittuani qaleralinnik aalisarnerup ineriartornera ernumanartoqartipparput, tamatumanilu pisassat pingaaruteqaqisut tungaatigut siunissaq ungasinnerusoq eqqarsaatigalugu iluanaaruteqarnissamut qulakkeerinnittussamik ingerlatsinissamut pilersarusiortoqarnissaa kissaatigalutigu.

Ukiup ingerlanerani suliffeqarfiup tunisassiorfiisa amerlanerpaartai annerusumik nukimmik imermillu maanngaannartumik atuineri kiisalu eqqagassat tungaatigut suliagarneri pillugit tunisassiorfinni avatangiisit tungaatigut pitsanngorsaanertalimmik avatangiisinik misissuisoqarpoq. Misissuisoqareernerup kingorna imermik, innaallagamik uuliamillu atuineq 8-17 procentimik annikillivoq.

Suliffeqarfiup iluani avataanilu attaveqaqatigiinneq pitsanngorsaavigaarput, tamannalu kinguneqarluartuq misigaarput. Taamaammallu tusaamaneqarnermut tunngasumik misissuititsinerup uppersarpaa, suliffeqarfiup Kalaallit Nunaanni ukiuni kingullerni isigineqarnera pitsanngoriaateqangaatsiarsimasoq.

Anguneqartut tunngavigalugit siunissap ajunngitsumik ingerlanissaa isumalluarfigaarput. Tamatumani ukiumoortumik naatsorsuutini ilanngaattissat ilanngaatigereerlugit angusap inerneru ullumikkut saqqummiussatsinnut sanilliullugu qaffasinnerunissaa ilimagaarput.

Kaaviiartitat 3 – 5 procentimik qaffariaateqarsimanissaat kiisalu 5 procentit sinnerlugit EBIT-marginimik taaneqartartumik iluanaaruteqartoqarsimanissaa ilimagineqarpoq.

Akiitsut erniallit milliardit sisamararterutaannik annikillisisimanissaat ilimagineqarpoq, tamatumani 1,3 mia. kr.-nngorlutik.

Kalaallit Nunaannili nioqqutissat tungaatigut nalorninartoqarnera peqqutaalluni ineriartornermi unammillernartunik toraagassaqarpoq, tamatumani raajartassiissutinik annikillisaanerit kiisalu nioqqutissatigut akinik unammilleqatigiinnerit atuummata, imaanngilarli niuernermi pissutsit akinik unammilleqatigiittoqarneranut peqqutaasut.

Taamatuttaa q unammilleqatigiinneq atuuttoq peqqutaalluni Europami niuernerq sukannernerulersimavoq.

Naak nunarsuarmi aningaasaqarniarneq nalorninartumik ingerlagaluartuq Royal Greenlandip ukiuni kingullerni ukiumoortumik naatsorsuutini uppersarpaa unammillerfiusut aqussinnaasarsimallugit.

Siulersuisut sinnerlugit piginnittoq ukiup ingerlareersup ingerlanerani tatiginninnermik takutitsisimammatt qajaffigerusuppara. Taamatuttaa angusap piviusunngortinneqarneranut sunniuteqaqataasut tassa suliffeqarfiup aqutsisui sulisuilu kiisalu tunisassiatsinnik nioqquteqartartut qajaffigerujussuarusuppakka".

Nalunaarut Namminersorlutik Oqartussanit tusaatissatut tiguneqarsinnaanersoq aqutsisumit apeqqutigineqarmat Rasmus Pedersenimit akuerineqarpoq.

Tamatuma kingorna aqutsisup nalunaarutigaa, aqutsisut nalunaarutaat oqaaseqaatillu aqutsisut nalunaarutaannut tunngasut ilanngullugit tusaatissatut tiguneqartut.

Imm. b pillugu) Ukiumoortumik nalunaarusiamik akuerisassanngorlugu saqqummiineq

Suliffeqarfissuarmi ingerlatsisoq pisortaanerlu Mikael Thinghuus ukiumoortumik nalunaarusiamik kukkunersioriigaasumik siulersuisuniillu akuerisaareersumik saqqummiivoq.

Angusat - EBIT – 240,8 DKK-upput. Ilangaaseereerluni angusat 136,4 DKK-upput. Thinghuusip nuannaarutigalugu oqaatigaa, sulisut sulillaarsimanerat suliffeqarfiup naammaginartumik angusaqarneranik kinguneqartoq.

Ilangaaseereerluni kaaviaartitat aamma amerleriarput, tamatumani 4.724 TDKK-niit 4.975 TDKK-inut - 5 %-imik – amerlimmata.

Angusat - EBIT-margin – aamma malunnartumik pitsanngoriarput.

Angusatigut ineriartornerup pitsaanerujussua sulilu pitsanngorsarneqarsinnaanera ukiuni kingullerni eqqartorneqartuarsinnarpoq. Niuerfiullaarsinnaasuni tuniniaanerup tungaatigut sulilluortoqarpoq, tuniniaanerlu siornatigumut sanilliullugu pitsaanerusumik ingerlanneqarlersimalluni.

Atlantikup Avannaata imartaaneersunik niueruteqarnek angusaqarluarnerpaaffiuvoq, tamatumani tunisassiarineqartut annikilligaluartut kaaviiartitat qaffammata. Angusat - EBIT - pitsanngoriarsimapput, tamatumani 6,4 %-imiit 7,5 %-imut qaffammata.

Europami niernikkut unammillernartoqangaatsiarpoq, tamannalu pissutigalugu aallussani allanituulli siuariaateqartoqarani. Koszalinimili aallussatigut ukiuni arlalinni ingerlalluarpallaanngereerluta ilungersunartumillu aallartinniareerluta pitsanngoriaateqartoqalaarpoq.

Suliffeqarfiup akiitsui 174 mio. DKK-nik ikilipput, akiitsutsinnillu appartitsinissarput pillugu anguniagaqarnitsinni akiitsut 250 DKK-nik ikilisinneqarnissaat anguniarparput, taakkunaniillu ikinnerungaatsiarput. Tamannalu ukiumi matumani pitsanngorsaavigineqassaaq, suliffeqarfiulli akiitsui ukiuni kingullerni malunnartumik ikiliartorput.

Aalisartut tunisassiassanik tunisinerannut atatillugu ukiumi matumani akiliutigineqartut 110 mio. DKK-nik amerlanerupput siorna akiliutigineqartunit 43 %-imik qaffasinnerullutik.

Kalaallit Nunaani sulisut ukiut arlaqartut qaangiutereersullu siullerpaamik amerlipput.

Ilinniagaqartitsinermut aningaasartuutit 16 %-imik qaffapput, tamatumani sulisumut ataatsimut 4.600 kr.-t atorneqarsimallutik. Tamatumunngalu aningaasartuutigineqartartut 6.000 kr.-mut ukiumi matumani qaffassasut ilimagineqarpoq, aqutsisutullu atorfiit Kalaallit Nunaanni najugaqavissunik inuttalersorneqarnissaat pingaarnertut anguniagaavoq. Suliffimmik misiliiffissat amerlassusaat 5-niit 12-nnut amerlineqarput. Sulisut 500-t piffissami 2012-imi ukiamiit 2013-imi upernaamut Royal Greenland Academymi peqataasussaassapput.

Misissueqqissaarnermi kingullermi inernerusut pitsaasut eqqarsaatigalugit tusaamaneqarnek suli annerusumik pitsanngorsarneqaaqqissaaq. Maluginiarneqartariaqarpoq sulisut suliffeqarfimmik isiginninnerat malunnartumik massakkut pitsaanerujussuusoq.

Ineriartorneq pitsaasoq ukiumi aggersumi ingerlaannassasoq qaffasinnerusumillu angusaqartoqarnissaanut patajaallisaanerusoqassasoq ilimagineqarpoq.

Iliuusissatut pilersaarut Naleraq 2013-imut tunngatillugu angusat naammaginarput pitsanngorsaanerillu nanginneqassallutik. Tamatumalli saniatigut ukiuni tulliuttuni 5-10-ni ineriartortitsinissamut pilersaarusiernerit aamma misissorneqassapput. Suliffeqarfiup aningaasaqarnikkut maanna pataajaannera ilutigalugu misissuinerit ingerlanneqarsinnaanngorput, tamatumani piginnittumut inuiaqatigiinnullu ataatsimut iluaqutaasinnaasumik suliffeqarfimmi periarfissat annertupput.

Tamatuma kingorna allaffimmi ingerlatsisup Rasmus Pedersenip nalunaarutigaa ukiumoortumik nalunaarusiamut tunngatillugu siunnersuutit Namminersorlutik Oqartussanit akuerineqartut.

Aqutsisup kingornatigut oqaatigaa siunnersuut akuerineqartoq.

Imm. c pillugu) Ukiumut nalunaarusiaq akuerineqartoq naapertorlugu sinneqartoorutininik atuissamut imaluunniit annaasaqatinik matussusiinissamut aalajangiineq

Aqutsisup ukiumoortumik nalunaarusiaq ilanngaaseereerluni 136.400 TDKK-nik angusaqarfiusoq taamaalisukkullu angusanit atugassiinissamut (1000 DDK) siunnersuuteqarfiusoq innersuuppaa:

Iluanaarutininik akiliineq	: 3.600
Ukiup tullianut nuussineq	: 32.800

Allaffimmi ingerlatsisup Rasmus Pedersenip nalunaarutigaa, angusanit atugassiinissamut tunngatillugu siunnersuutigineqartoq Namminersorlutik Oqartussanit akuerineqartoq.

Aqutsisup kingornatigut oqaatigaa siunnersuut akuerineqartoq.

Imm. d pillugu) Siulersuisuni ilaasortassanik qinersineq

Aqutsisup ilisimatitsissutigaa, siulersuisuni ilaasortatut ataatsimeersuarnermi qinikkat ukiut marlunni ilaasortaasartut. Siulersuisuni massakkut ilaasortaapput:

Niels Harald de Coninck-Smith (Siulittaasoq)
Marie Fleischer (Siulittaasup tullia)
Svend Bang Christiansen
Pernille Fabricius
Sara Heilmann
Peder Tuborgh
Lars Berthelsen, sulisut sinniisaat
Peter Korsbæk, sulisut sinniisaat
Niels Ole Møller, sulisut sinniisaat

Oqaatigaalu siulersuisuni ilaasortaareersut Niels Harald de Coninck-Smith, Pernille Fabricius aamma Marie Fleischer ullumikkut qineqqusaartut.

Allaffimmi ingerlatsisup Rasmus Pedersenip ilisimatitsissutigaa, qineqqusaartutut qulaani taaneqartut siulersuisuni ilaasortatut qinerneqaqqissasut.

Aqutsisup siulersuisuni ilaasortat nutaat qinerneqaqqittullu atuuffissaat ilisimatitsissutigai, takuuk aktieselskabit pillugit inatsimmi § 49, imm. 6.

Niels Harald de Coninck-Smithimut tunngatillugu qinersinermi kingullermi allannguisoqanngilaq.

Marie Fleischer Sermersuumi Inuussutissarsionermut Siunnersuisooqatigiinni pisortaavoq.

Pernille Fabricius Damco A/S-imi A.P. Møller – Mærskeniimit piginneqataaffigineqartumi Global CFO-uvoq. Taamatutaaq Damcop ingerlatseqatigiiffiini assigiinngitsuni siulersuisuni ilaasortaavoq.

Allaffimmi ingerlatsisup Rasmus Pedersenip apeqqutigaa, Namminersorlutik Oqartussat siulersuisuni ilaasortatut qinerneqaqqittutut taaneqareersut qinerneqaqqinnerannik akuersinersoq.

Allaffimmi ingerlatsisup Rasmus Pedersenip nalunaarutigaa, qinerneqaqqittut Namminersorlutik Oqartussanit akuerineqartut.

Aqutsisup kingornatigut oqaatigaa qineqqusaartussatut siunnersuutigineqartut qinerneqartut.

Taamatutaaq ilisimatitsissutigaa, sulisut sinniisaannik ukiut sisamakkaarlugit qinersisoqartanera pissutigalugu kingullermik ataatsimeersuartoqarnerani sulisut sinniisaannik qinersisoqarsimangitsoq, tamatumani lu siulersuisuni ilaasortat ukuusut:

Svend Bang Christiansen (2014-ip tungaanut)
Sara Heilmann (2014-ip tungaanut)
Peder Tuborgh (2014-ip tungaanut)
Niels Harald de Coninck-Smith (2015-ip tungaanut)
Pernille Fabricius (2015-ip tungaanut)
Marie Fleischer (2015-ip tungaanut)
Lars Berthelsen, sulisut sinniisaat
Peter Korsbæk, sulisut sinniisaat
Niels Ole Møller, sulisut sinniisaat

Imm. e pillugu) Siulersuisuni siulittaasussamik qinersineq

Aqutsisup ilisimatitsissutigaa, ataatsimeersuartoqarnerani siulersuisuni siulittaasumik ingerlatseqatigiiffiup malittarisassai naapertorlugit qinersisoqartassasoq. Ukiut marlukkaarlugit siulersuisuni siulittaasussamik qinersisoqartarpoq. 2011-mi ataatsimeersuarnermi siulersuisuni siulittaasussamik qinersisoqarnikummat siulittaasussamik massakkut qinersisoqaqqissaaq. Maannamut siulersuisuni siulittaasooq Niels Harald de Coninck-Smith qinerneqaqqissasoq siunnersuutigineqarpoq.

Allaffimmi ingerlatsisup Rasmus Pedersenip nalunaarutigaa siulittaasooreersup qinerneqaqqinnissaa Namminersorlutik Oqartussanit akuerineqartoq.

Aqutsisup kingornatigut oqaatigaa, Niels Harald de Coninck-Smith siulersuisuni siulittaasutut qinerneqaqqittoq.

Imm. f pillugu) Siulersuisup siulittaasunilu ilaasortat akissarsiassaannik aalajangersaaneq

Aqutsisup nalunaarutigaa, siunnersuutigineqartoq siulersuisuni siulittaasup akissarsiai allanngortinneqaratik 400.000 kr.-ussasut, siulersuisuni siulittaasup tulliata akissarsia allanngortinneqaratik 300.000 kr.-ussasut siulersuisunilu ilaasortat allat akissarsiaat allanngortinneqaratik 200.000 kr.-ussasut.

Aqutsisup apeqqutigaa, akissarsiassatut siunnersuutigineqartut akuerineqarnersut.

Allaffimmi ingerlatsisup nalunaarutigaa, akissarsiassatut siunnersuutigineqartut Namminersorlutik Oqartussanit akuerineqartut, tamatumanilu akuerineqartutut aqutsisumit nalunaarutigineqarlutik.

Imm. g pillugu) Kukkunersiuisunik qinersineq

Aqutsisup ilisimatitsissutigaa, siunnersuutigineqartoq KPMG GRØNLAND STATSAUTORISERET REVISIONSANPARTSSELSKAB ingerlatseqatigiiffiup kukkunersiuisuattut qinerneqaqqissasoq. Apeqqutigaaalu tamanna Namminersorlutik Oqartussanit akuerineqarnersoq, akuersineralu allaffimmi ingerlatsisumit uppersarneqarpoq.

Aqutsisup kingornatigut oqaatigaa, KPMG GRØNLAND STATSAUTORISERET REVISIONSANPARTSSELSKAB ingerlatseqatigiiffiup kukkunersiuisuattut qinerneqaqqittoq.

Aqutsisup kingornatigut oqaatigaa, oqaluuserisassat tamarmik oqaluuserineqareersut apeqqutigalugulu allanik oqaaseqaateqarusuttoqarnersoq. Allaffimmi ingerlatsisup Rasmus Pedersenip pisortaqaatigiit siulersuisullu suleqatiginnilluarsimanerat pillugu qutsavigai.

Tamatuma kingorna aqutsisup ataatsimeersuarneq naammassisutut oqaatigaa torersumillu ingerlanneqarnera pillugu qujalluni.

Aqutsisoq:

Gedion Jeremiassen (atsiorneq)
Eqqartuussissuserisoq